



革除遺事卷四

董倫

董倫字安常本東昌恩縣人世居燕之宛平自為
儒生處山林布褐藜藿已懷憂世之志學者多從
之遊以所居具川因稱為具川先生元末徵辟不
出國初擢用單縣儒士洪武十五年寧以倫薦遣
使徵之以為春坊贊善大夫賜冠帶事懿文太子
其所陳說多忠厚之言

太祖皇帝聞而善之十八年正月由右春坊右贊善
陞左春坊大學士賜文綺六疋鈔五十錠會東宮晏

駕二十五年出為河南左叅議在任盡心民事名
其退食思政之堂曰後樂方孝孺為之記嘗草封
事數千言無一不愜

上心者二十六年上書薦肇州吏目諸葛伯衡
上命擢為陝西右叅議三十年以註誤坐免典教滇
南東宮憐其老賜以白金若干鑑倫行至成都蜀
獻王深寵文留連彌月恩禮有加賦詩八章以送
行至滇凡作養成就用夏變夷漸磨煦育皆出于
仁義道德故雖蠻童夷豎皆知向方洪武三十一
年後五月

建文君即位眷念東宮舊臣屢詢及之左右多言倫
可用即召至京師慰勞甚至拜嘉議大夫禮部侍
郎兼翰林院學士與孝孺皆入內禁侍經筵是年
七月十三日賜御書怡老堂三大字及髹几玉鳩
杖各一倫上表稱謝初監察御史解縉嘗代夏長
文作劾齊泰書泰銜之被泰誣斥

太祖令縉十年著述始許擢用未及期會

太祖賓天縉遽赴臨權臣謂赴臨非詔旨遂謫河州
縉與倫書祈哀歲餘權臣黜倫言之

上詔縉還以為翰林侍詔其拳拳汲引皆此類也倫

為人質直敦厚富有文學為時所重革除間屢懇
言當務親睦不聽

太宗即位時倫年八十餘
上命致仕出京數日卒

張統

張統字昭李號鷄庵西安富平人父月川文行知
名統由明經舉為東宮侍書才識通敏懿文皇太
子器重之洪武十二年冬陞通政司左叅議尋出
為雲南布政司左叅政進布政使凡土地貢賦法
令條格祀神壇祠公署解字與夫上下典儀公用

程度悉裁定之夷民心孚遠邇真安二十年三月
秋滿入覲

上嘉其能稱為天下第一賜璽書勞之曰曩者討平
西南夷命官撫守爾統實先挺任今五年矣言出
則諸蠻聽服令布則四海歡欣皆由誠信相孚克
供乃職今年來朝不待考而朕知其功出乎天下
十二牧之首故加汝績復命仍治黔南汝往欽哉
還治三十一年召為吏部尚書會修

太祖皇帝實錄披者試翰林之任編纂者考第高下
而宜之時傷士竒以教官徵入翰林亦在試列統

讀其策獨喜曰明達時務有用之才不但文辭之功也以為第一奏授王府審理士奇由是著名後果大用其知人之鑑如此壬午六月靖難之師入京城討奸黨統與焉及

上即位召統與王純諭曰卿二人久事

皇考習知典故今既考矣其解職務月給尚書半俸居京師視事政有戾舊制并向朕直言之無隱庶稱厚望老成之意統遂自經于部之後堂

徐輝祖

徐輝祖鳳陽人中山武寧王之長子王為開國功

臣第一洪武二十一年十月輝祖襲封魏國公始名允恭

高廟賜今名為革除君所信任

文廟興靖難師以輝祖元舅也召之不為動遂與黃子澄齊泰盧振張昺葛誠等通謀內難平子澄等死

上以中山王有大功于國家赦輝祖不誅惟革除爵祿令閒住被繫而死永樂五年八月詔還其祿米輝祖時已死其子欽仍襲魏國公

景清

景清陝西真定人本姓耿以報籍而訛侗尚大節領鄉薦游國學時同舍生有秘書清求焉弗與固請約旦見即還曰吾縱敏能一夕盡熟之耶生不得已與之旦往索其書曰吾不知何書初未嘗假汝也生忿訟於祭酒清即將所假書往見曰此清燈窓所業書耶即背誦徹卷及問生生無以對也祭酒叱生退清即以書還生曰吾以子診秘太甚特此相戲耳初赴舉時店家有女為妖憑清宿其家是夜妖不至去即復來女詰之曰避景秀才耳旦日女以聞其父父追及清語之故清書景清

在此四字令父歸粘於戶而妖自是遂絕後清試甲戌禮部中第三錄詩書二經對大庭賜第二人及第八翰林三載改監察御史丁丑春召見嘉其材能會署都察院為御史府改御史大夫

文廟繼統方孝孺練子寧等同日死之而清獨委蛇侍朝人疑焉一日清早朝着緋衣入先是星者奏文曲犯

帝坐甚急

上備之固疑清及朝清獨着緋也遂收之而得所帶劔因加詰責清不屈而死死之夕精英特見嗚呼

豫讓為主報讐清豈其倫歟

龔泰

龔泰字叔安金華義烏人九歲而孤母傅氏躬教之遣就外傳日記數千百言長從宋濂之門人宗恩睿游洪武丙子領鄉薦明年入太學奉旨閱齊王府衛綜畫周密衆始危之而後服之吏部策試第一除戶科試給事中辛巳遷都給事壬午六月太宗師渡江泰與其妻傅決曰顧事至此我且分死矣尔第齎勅携幼稚以歸否則俱溺于井辱可免也言未既火起內廷泰馳赴之道為兵校所執見

上於金川門命非奸籍者釋之泰亦釋乃遂投城下死是月十三也泰遇事剛果有為以友孝聞始居邑庠出息學宮之險俄有征者至擠泰於池幾溺弗救或請訟官泰曰彼誠病狂于吾何較卒不納鄉人趙文慶者為盜所竊跡之弗得有謂誣言其用如嚮扣之當得其實願泰俱往及往巫見泰瞠目不能出一語衆由是服泰之正死時年三十六卿大夫莫不悲之子永吉累官兵部右侍郎改南京大理寺卿致仕議者謂泰得罪不及族亦有其由或謂泰繩軍士最嚴其死蓋讐之者所為也

陳性善

陳性善名復初以字行山陰人洪武中以春秋魁

鄉試丁丑會試列名上第臚唱時

上見其凝重屬目久之謂侍臣曰向唱名陳性善者

君子人也賜進士出身授行人司副已而入翰林

檢討初誠意伯劉基薨

上命御史李鐸往取其遺書基子璉即出觀象玩占

於石室中從鐸於闕上之上簡精楷書者數人入

便殿繙錄性善預焉

上天威嚴重進見者皆惶汗甚或掣肘不成一字惟

性善動止安雅既沒書法端妍

上嘉悅命賜以酒是時天威巨測性善淹留竟日家

人以為必死既出莫不大驚久之超拜禮部左侍

郎薦進薛岩岩輩前雲南布政使韓宜可方隸謫

籍亦以性善言起為副都御史皇太孫在東宮已

上熟性善名及即位一日退朝獨留性善賜之坐問

及以治天下之要且使書于紙以是感知遇盡所欲

言

朝廷悉從之然施行未竟輒為權奸所更改性善朝

見曰

陛下不以臣愚猥承顧問臣既僭塵

上聽許臣必行今而詔書云然所謂為法自戾

陛下無以信天下矣未幾

文皇帝入靖內難

上命性善監李景隆軍大戰白溝河敗績與大理寺

丞彭與明欽天監副劉伯完指揮王賚等皆被執

以歸

文皇帝悉縱遣之性善朝服躍馬入于河以死詔加

追戮徒其家屬于邊後悉赦還邑人吳駟為傳其

事

平安

平安一名保兒真定藁城人驍勇有名決戰善取

勝庚辰四月以都督指揮從李景隆戰白溝河辛

巳閏三月戰藁城統卒十餘萬大敗北京于小河

壬午春克副總兵督遼東軍十餘萬圍通州大戰

單家橋四月退至靈壁將軍為北將朱能所擒安

嘗操長鎗馳馬追文廟及之馬蹶乃弗克前至是

上問曰向若非馬蹶汝將何為安大言曰刺殿下如

摧朽耳

上壯其言嘆曰

高皇帝養下好漢子慰勞甚至命掌北平都指揮使
司事京城既平久之

上嘗謂平保兒尚在耶安遂自經死少保李賢稱鉄
鉉之死之烈曰平氏有愧焉又有北平都指揮孫
狗皮者徐州人革除年間有戰功以忠義聞後永
樂初降百戶

樓璉

樓璉字士連金華人嘗從宋濂學洪武中以儒士
召主宣寧壽仁壽二縣簿革除君嗣位屢下詔求
賢濂以文學舉入翰林侍講經筵官至講讀靖難

師定京城

文廟命方孝孺草詔孝孺哭且罵授之筆擲諸地曰
身可死詔不可草改命璉為之方入時見孝孺受
凌遲之刑未畢璉惶惧受命歸而憤難妻子問之
曰得無傷方先生耶璉愧曰我受刑尚可正恐累
及尔輩耳遂巡間一家皆自經死

劉有年

劉有年字大有其先本廬陵人元季徙家沅州
洪武中以明經起家擢監察御史學行焯焯有稱
尋以辭官養母忤旨謫通州擺站間於州故家得

儀禮逸經十二篇上之詔藏秘閣建文即位復起
太平府知府
文廟入正大統以不肯迎駕謫雲南丙子之春與王
紳遇以道義相最黔國公知其賢遣諸子從學且
薦于朝及交趾平起為交趾按察司僉事其卒也
尚書黃福諫之曰江湖膏次洙泗規模文肩韓柳
學本朱程其為名流所推如此惜欠革除
君一死耳

鄭居真

鄭居真徽州人父僭有文名國初歷任路州同知
居真豐頰美髭髯從父官閩中因從尚書貢泰再
游洪武中以明經舉授鞏昌府通判陞禮部郎中
甚見重

高皇帝時終河南布政司左叅政坐累卒于南京有
文曰閩南集閩隴行藁歸來隨藁檜廷藁子孫因
留福州瓜山方孝孺之為漢中教授也居真以詩
送之曰翩翩紫鳳雛羽翮備五彩徘徊千仞崗餘
音散江海於馬攬德輝濟濟鏘環珮天門何差峨
群仙久相待臣沐希朝陽夜息飲沆壑如何復西
飛去去秦關外岐山諒匪遙啄食良自愛終當巢

阿閣庶以明昭代又次韻寄孝孺云闕下知名久
相逢值暮春才華曾動主論議每過人漢水元通
蜀台州亦近閩何時江海上尊酒話西秦為問天
台客何時別草堂千巖空劔氣萬卷有虹光為政
慚吾拙擒辭屬子良方思歌伐木深負誅甘棠孝
孺亦嘗贈之文謂其為叅政三年而去吏民以不
能留為憾事在洪武二十三年然其坐累歲月不
可考蓋或因孝孺之故云

魏澤

魏澤字彥思應天府溧水人有學行累遷至刑部
尚書先是燕師南下姚廣孝謂曰殿下至京幸全
方孝孺殺此人則天下讀書種子絕矣

上納之至既建文帝亡遂召孝孺謂曰我以周公匡
成王而來成王不在當議所立對曰
殿下既以匡王室而來成王不在當立成王之子忤
旨因其滅十族等語

上大怒囚于獄以廣孝言未即殺收捕其族黨每捕
者至輒歆服之不屈乃令盡誅之澤是時謫為寧
海典史當捕方氏時悉力保護使免于辱且資以
行費後過孝孺故居有詩云筍輿衝雨過侯城撫

景令人感慨生黃鳥向人空百轉清猿墮淚只三
聲山中自可全高爵天下難居是盛居却憶令威
千載後重歸華表不勝情聞此壯澤之言

革除遺事卷四終

革除遺事卷五

沐春

沐春字景

鳳陽定遠人黔寧王沐英長子也生

未暮母歿鞠於外氏長歸就學年十七時英往西
番明年從征迤西乃俱擒其渠魁又明年從征雲
南歷功先士卒癸亥還京師遂掌禁旅冬迤西寇
僭號順天王扇諸郡作亂春與征奮勇先登殲之
乙丑秋授驃騎將軍僉後軍都督府事廷臣請試
職

上曰是兒我家人非他比也昇實授春剖決如流嘗

錄囚于烈山審逆黨于蔚州奏釋各數百人壬申
英薨于雲南春往奔喪起復襲爵西平侯鎮雲南
一遵父道為屯田政為要務歲較多寡嚴賞罰稱
功力倍饋餉以足已而緬酋暨東川夷相繼作難
春命將授成算遂皆殄平甲戌春復平越雋番寇
越酋蠻阿資者先平倡亂朝廷費數萬之師往往
無功春平之麗川宣慰思倫發為其下所圍戊寅
四月破力千益諸岩誅其罪首而釋其餘衆自是
諸夷震懼不服携二功聞授征虜前將軍使盡平
其地九月十二日春薨年三十六革除君震悼加
厚轉為謚之曰惠襄春沉毅果敢明識紀論在鎮
七年闢田至三十萬餘頃復民戶至五千餘又嘗
鑿鉄池河灌涸田數萬畝民受其利云弟晟襲西
平侯初建文君之奔也晟使人護之或時至西平
侯第然人亡有知也

王紳

王紳字仲縉金華義烏人父禕以文行重海內與
宋濂齊君國初翰林侍制使雲南伏節死時紳甫
十三聰敏過人落筆為文沛然不可禦鞠于伯民
綬事母何盡孝父卒哀毀踰禮未幾綬亦歿紳獨

綜理生業榮榮憂患中而傑然負奇志暇日益取
經史百氏言窮其旨歸縱橫磅礴出入上下宋濂
一見即器之曰王華川其有後乎一時俊傑多自
服下逮洪武二十五年蜀獻王聞其賢馳書幣聘
致待以客禮俾教授蜀郡紳痛父遺骸未返立隴
白其情事王憫之給道里費以行至雲南訪求不
獲遂即死所奠祭仰天號慟幾絕過者為之泣下
沾襟述滇南慟哭記以見志雲南布政張統尤重
之作吊王翰林文貯其情既還王慰勞備至蜀人
無貴賤咸知愛敬建文君即位召為國子博士遂

入詞垣編摩

太祖實錄與侯城方孝孺交游賞宗孝孺為百代儒
宗勸之著書以淑來世孝孺不以為然紳自是益
嚮道德而畧文藝嘗以其父死節事聞于朝得旨
贈翰林院學士謚文節開國以來文臣有謚者寔
自禧始庚辰十二月丙午紳卒年四十有一有繼
志齋集三十卷行于世

王徐

王徐字叔豐紳子從學方孝孺為所器許妻以女
逮其難之及也嘗周旋其間又嘗與孝孺表姪鄭

珣至聚寶門外求其遺骸以歸塋而不得卒坐逮繫

文皇帝念祖禘死國之功大從宥免且方嚮用之而力稱以疾辭還金華讀書結屋青巖之下將終身焉得孝孺遺文私藏之徐性至孝初紳痛念父歿每食必斥魚味徐一遵其志子孫相承閱數十年不變事母丁如事其父送終盡禮三年酒食未嘗入于口學問該博士之從遊者日衆郡邑交重之恒禮為鄉飲賓坐以分獻于先聖廟徐踈髯偉貌出必儼然古冠服人爭觀之曰此王先生也所著

有青巖稿聖廟文纂金華賢達傳續文章正統卒年五十九門人私謚孝莊先生

高遜志

高遜志字仕敏徐州蕭縣人元末僑寓嘉興自幼好學嗜文辭嘗侍文宦遊中吳一時文章大家如宣城貢師泰番易周伯琦遂昌鄭之祐皆在遜志獲受其業故其為文深純典雅成一家言年三十五為鄭山書院山長洪武二年徵修元史入翰林為編修累遷侍講學士建文廟兼太常寺右少卿庚辰會試與董倫為考試官精於去取而名士胡廣

吳博楊士榮楊溥胡濙輩皆入彀中號得人焉內
難既平遜志存歿莫考嘗考是科同預較藝者右
拾遺朱逢吉編修史官吳勤業惠仲趙友士徐旭
者永樂初為吏部郎中與逢吉皆預重修

高廟實錄旭陞國子祭酒余士吉永樂初拜僉都御
史

唐愚士

唐之淳字愚士以字行紹興山陰人父肅國初應
舉翰林文字有名愚士少有奇志攻學不倦年二
十餘已有聲浙水父謫死臨濠辛勤扶喪歸塋追

求其平生所作不憚荒遠纂錄收拾如獲金璧時
時伏讀淒切人為之掩泣然愚士亦工為文者且
喜筆札酷以其父洪武中屢有薦之者謝不就曹
國公李景隆好士為勳戚第一聞其名走使者請
至家俾其子師焉征行四方皆與俱歷燕薊奏周
覽前代遺蹟援筆而賦躡躑一時歲辛巳嗣君詔
翰林詞臣集數千載經史中事為書以考治亂為
鑑戒命舉優通文學士方孝孺輩以愚士薦
上亦雅知其名且謂曹公之客必召趨召至殿廷即
拜翰書進讀賜以冠帶俾與孝孺俱預修書事且

同以前漢書進讀未幾病以閏三月二十三日卒
時景隆久將兵于外及歸則愚士病甚不可為矣
賙卹之甚厚所著有萍居稿文斷諸書

錢芹

錢芹字繼忠蘇州吳縣人少負氣節欲以奇功自
奮元季以策干諸將無遇洪武初辟大都督府掾
從大將軍徐達出北平絕大漠凱旋俄以列解職
家居二十年安貧守道為郡守姚善所知語在善
傳革除初年詔求遺逸善以芹應詔召對稱旨留
中議事後為戶部司務北僑有警署行軍斷事從

征虜將軍咨謀會軍府遣芹入奏道病卒瀕猶條
邊事緩急

上執政年七十二

賜棺殮歸葬黃山

王艮

王艮字欽止吉水人建文己卯江西鄉試第一明
年對大庭復當第一以貌不及胡廣對策有親藩
陸梁人心不搖等語

上以為敢言遂擢廣狀元而以艮次之遵洪武乙丑
事例首甲皆授脩撰艮與第三人李貫皆預焉艮

聞靖難師起常憂懼輒不食日就羸憊以辛巳九月卒
上憫之遣禮部侍郎黃觀諭祭艮之家譜所述如此
而吉安乃曰
文廟繼統先一日郡臣多往迎附艮闔門與妻子訣
是夜吞腦子死非其實也後廣與貫皆事

太祖一日上於宮中持建文時群臣所上封事千餘
通覽一二有干犯者命翰林侍講解縉等編閱閱
係軍馬錢糧數目則留餘干犯者悉焚之既而從
容問縉曰尔等宜皆有之衆稽首未對脩撰李貫

進曰臣實無之

上曰而以獨無為美耶食其祿思任其事當國家危
急之際在近侍獨無一言可乎朕非惡夫盡心於
建文者但惡導誘建文壞祖法亂政紀耳尔等前
日事彼忠于彼今日事朕忠於朕不必曲自遮蔽
也

宋懌

宋懌字子夷金華人宋濂之孫也懌父璉中書舍
之懌思紹父學奉母居蜀蜀獻王憫之特賜粟帛
賜其家由是益得專于學其書益工建文君即位

念瀛為
皇考興宗皇帝舊學之臣召懌復官之于翰林為侍
書與劉彥銘朱思平皆見知于建文時而瀛門人
有聲稱者同郡樓璉浦陽鄭楷見擢用

革除遺事卷五終

革除遺事卷六

耿炳文

耿炳文濠州人父君用元末從

高廟取滁和積功為明威將軍管軍總管其後克采
石取金陵日有功炳文皆蒞焉丙寅歲與張士誠
戰宜與軍用賈勇先登君用死炳文代領其軍明
年取廣德長沙擒士誠守將而降其兵會立元帥
府于長興以炳文為總督都元帥守之辛丑敗士
誠將李伯昇追斬五千餘級拜指揮使撫綏有方
湖人安堵吳元年征蘇州士誠就擒論功召戰將

降諭曰今日之功雖古名將不能過也陞文都督
府僉事洪武之初陞授鎮國大將軍兼右率府副
使二年同徐達征陝西克之留炳文鎮守三年正
月授秦王府左相兼陝西行省右丞十一月封長
興侯十四年輔徐達大破虜兵于北黃河復還陝
西二十四年賜寶鏹五萬錠鈔二千錠俾造第鳳
陽葺其先塋而追爵君用為侯二十五年陝西兩
當縣妖人作亂承制總兵聲討至二十七年始克
之三十年蜀中盜起命為征西將軍往剿平之三
十一年鎮守遼東革除改元靖難兵起其年九月
命炳文佩大將軍印自遼東率眾二十萬援真定
都督徐凱領兵十萬駐河間都督潘忠楊松營莫
州先鋒至雄縣

太宗帥師禦之會屆中秋出炳文不虞破其城忠松
引眾來援伏兵起忠等皆被擒因得炳文虛實遂
長驅至真定壬戌靖難將張玉朱能譚淵來戰炳
文大敗幾為所擒奔還凖泥河東炳文眾向數萬
十月復與朱能戰眾皆潰降副將駙馬都尉李豎
都督審忠顧成都指揮劉遂俱被擒炳文固守燕
兵攻城二日不能下而去炳文老将長于戰至是

覆敗建文君始有憂色遂召之還以李景隆代之
竟至于亡及
太宗即位舊將惟炳文與郭英皆見用炳文後以謹
死年六十五長子璿前軍都督僉事尚懿文長子
江都郡主革除中為駙馬都尉次珣龍虎將軍後
軍都督僉事亦預親藩之征瑄散騎舍人擢尚寶
卿皆獲罪無後

李景隆

李景隆泗州盱眙縣人父文忠曹國公長公主之
子為開國元勳追謚岐陽武靖王景隆以洪武十
九年四月襲封曹國公上嘗書體爾祖宗忠孝不
息八字以賜之使之讀書友儒生一時帝布有名
者若天台林友輩皆與相遊革除君即位與魏國
公徐輝祖等俱以元勳子任用

太宗靖難師起命為征虜大將軍帥師往伐賜通天
犀帶餞之江許遂乘傳至德州收集耿炳文敗亡
將卒悉調各處軍馬五十萬進營河間
太宗語諸將曰李九江拳養之子寡謀而驕矜色厲
而中餒忌刻而自用况未嘗習兵見戰陣而輒以
五十萬付之是自坑之矣漢高祖大度知人善任

使英雄為用不過能將十萬九江何等才而能將
五十萬趙括之敗可待矣復召報者問景隆軍中事
上曰兵法有五敗景隆皆蹈之為將政令不修紀律
不整上下異心死生離之一也今北地早寒南卒
裘褐不足披冒霜雪手足皸瘃甚者墮籍又士無
贏糧馬無藁草二也不量險易深入趨利三也貪
而不治智信不足氣盈而復仁勇俱無威令不行
三軍易撓四也部曲喧譁金彭無節好諛喜佞信
任小人五也九江五敗悉備保無能為然吾在此
必不敢至今須往援永平彼知我出必來攻城回
師繫之堅城在前大軍在後必成擒矣諸將曰永
平兵少

太宗曰城中之衆以戰則不足以守則有餘且世子
能推誠任人足辦禦敵若全軍在城祇自示弱彼
得專攻非策之善兵出在外奇變隨用內外犄角
破敵必矣吾出非專為永平直欲誘九江使來就
擒耳吳高決不戰聞我來必走是我一舉解永平
圍而破九江也九江景隆小字云十一月景隆引
兵數十萬圍北平城再戰鄭村壩大敗匿不以聞
明年二月癸亥景隆致書

太宗詞不遜諸將皆怒四月丙申引兵號百萬軍德州郭興吳傑等軍真定移漸近北先是朝廷命中官賈璽書賜景隆斧鉞俾伐征伐渡江沉于水識者以為不祥至是復賜之已而遇靖難師戰于白溝河三進三敗所部兵將漫散南奔而德州等處俱失守惟山東叅政鉄鉉固守濟南北兵圍之不下緣江舟兵皆望風降揚州衛指揮王禮高郵等衛指揮王傑等相率納款景隆不以為意未幾鎮江亦北附矣建文君憂惶不知所出景隆遂奔還

太宗既渡江駐蹕金川門上猶使之城守景隆遂與谷王穗開門迎納今上閉宮自焚六月十三也九月初四日論功行賞封景隆奉天護運推誠宣力武臣特進光祿大夫柱國太子太師曹國公增祿一千石通前四千石子孫世世承襲賞銀四百兩綵段四十表裏鈔四千貫尋命充修

太祖皇帝實錄都總裁官景隆與解縉秉筆多所更易其後谷王以謀逆廢為庶人景隆亦獲罪革爵闔門被監禁尋下獄而死盛庸者歷城侯也既降

至永樂元年十月都御史陳瑛論之亦削爵論死
二人者使老死牖下與死國難等死耳寵光猶在
僂辱隨之天之報施果如何哉

王純一作錢

王純字士魯河南太康人洪武間由吏部郎中為
福建布政司叅議陞叅政寬慎廉介民思其惠革
除年間遷戶部尚書靖難師至純走出城外已而
歸附

文廟登極召見之曰尔向輔建文間朕骨肉今何顏
耶純頓首慚謝命降通政使仍令致仕純快快成

疾卒子璽官至戶部侍郎

鄭賜

鄭賜字彥嘉建寧人乙丑進士除監察御史陞湖
廣布政司右叅議丁憂起復改北平布政司坐事
謫安東也革除間召為工部尚書

太宗登極轉刑部禮部後為侍郎趙玘讒間以憂卒
仁廟初贈太子少師謚文安

黃福

黃福字汝錫平度州昌邑人由監生授項城主簿
遷金吾前衛知事陞龍江衛經歷上書論大計洪

武中超陞工部右侍郎革除間永樂初遷左侍郎
尋陞尚書北京初建改北京刑部尚書交趾既平
置三司命掌布按二印在交趾二十年

仁宗初詔還會交人叛鎮守尚書陳洽奏請還福于
交命福同將臣帥師以征及戰失利交人擒福不
忍交害送之出境召為戶部尚書數日轉南京戶
部尚書正統初加少保仍兼尚書守備南京五年
正月卒成化初贈太保謚惠宣

太宗御極時治齊黃離間之罪李景隆於
上問并指福為奸福厲聲言臣罪應死但自為奸則非

上知其正直置不問

尹昌隆

尹昌隆字彥謙吉安泰和人在鄉校已擅文名應
貢中應天鄉試第一洪武丁丑禮闈第二賜進士
及第授翰林編修改監察御史革除中大臣相訐
奏旨命各道鞠之同官皆畏縮昌隆獨不避一繩
以法巡按中
去貪竒理冤獄所至風裁凜然
還朝上疏言節民力謹嗜慾勸勤治務正學不報
既而京師地震復上疏言陰盛陽微奸臣專政所
致執政者憾焉默知白寧縣以清白公勤稱坐中

使誣呪咀下獄既得白還京師預密議
文廟入正大統有白昌隆者不聽改北平按察司知
事時
皇儲未立武臣丘福言
皇帝二子高輿有扈蒞功
上猶豫驛召昌隆叩首曰長嫡承統萬世常經
上悟遂冊仁宗為皇太子高輿為漢王進昌隆為左
春坊中允在東宮屢進讜言皆納嘉漢王忿切齒
諧於
上又明年黜為禮部主事時呂震為尚書屬官諂附

者率得近恣昌隆剛果証其預谷廢人謀逆事昌
隆死焉家亦籍沒

茹瑞

茹瑞衡州衡山人洪武中由監生官至右通政甚稱
上意稱為內外一人舊令中外文武服勤在官者復
甚家

上以茹瑞卓異并其池塘園林一切租稅悉蠲之令
其叔與弟詣闕謝及陞辭
上賜鈔錠仍勅光祿賜酒散與瑞詣其門餞之累遷
兵部尚書太子少保革除間以尚書掌河南布政

司事靖難師起常主兵餉及迫近京師詔以諸王分守諸城門遣李景隆都督王佐及瑋往龍潭見太宗瑋望風吐欵未幾遂入宮群臣未有言瑋獨先於上前稽首勸進及即位以瑋有奉天征討功奉天翊運守正文臣特進榮祿大夫柱國太子少保兵部尚書忠誠伯食祿一千石子孫不世襲詔以秦王第二女長安郡主下嫁其子鑑禮遇優渥賜賚不可勝筭後乞骸骨得致仕于家尋以事逮至京師死於獄

羅義

羅義山西都司清遠衛戍卒也建文中舉兵加親藩義詣閔上書乞息兵講和其文多不載并附上燕王書其書畧曰昔者武王崩成王幼周公乃叔父也而輔相也管叔流言間王室周公誅之殿下聰明英主博通經史今之周公也宜以周公謹守燕王則天下皆知以為周公之聖復生于今日矣又謂古之夷齊以國相讓去隱首陽山矧聖賢欲成天下之事必先明順逆之理成敗之勢禍福之機又得天道之宜人心之安然後可今殿下以藩國敵朝廷如遂其願愚實羞之乞早息兵書上忤

旨下獄

太宗即位以義為戶科給事中尋陞湖廣左叅議又
陞前湖廣左叅議楊砥為鴻臚寺卿以其在建文
時嘗上書請敦親恩罷兵息民故也

薛嵩

薛嵩陝西閩鄉人慷慨負志操有治才口辨洪武
間累官大理寺少卿革除年間大見信任辛巳閏
三月兵屢敗方孝孺建議草詔令嵩賫至燕軍又
作宣諭數千言刊印千餘紙附嵩令密散諸將士
使歸心嵩見上言殺下且釋甲謁

孝陵即暮令旋師

太宗叱其給左右欲殺之

太宗曰此

天子命使也釋之而某謀不行及內難平免嵩死謫
廣西永樂初安南國王為黎季犛所殺其孫陳天
平自老撾行歸季犛子蒼請還居之

上命廣西總兵官都督黃甲以兵五千送歸其國中
舉嵩為輔行至芥站伏發劫天平去嵩被虜殺之

陳瑛

陳瑛

人歷任洪武至革除年為北平按察

使坐交通藩邸謫廣西

太宗即位首召為都察院右副都御史怨建文諸臣最深

上為帝允炆輟朝五日瑛請減之

上不茲尋抗奉黃觀廖昇王叔英周士脩王良顏伯瑋皆悖逆宜追戮之

上曰朕初舉義誅奸臣不過齊黃數輩耳後來二十九人中如張統王純鄭賜王福尹昌隆皆宥而用之今汝所言數人况又不與二十九人之數者彼食其祿自盡其心耳悉勿問蓋

上初入京城昇及是修自縊死觀時守安慶投江死叔英守廣德自縊死良在官闔家自焚先是

上兵至沛縣伯瑋不肯下與其子俱死後英聞方孝孺等獄詞遂簿錄觀叔英安妻女盡皆給配觀妻出通濟門先擠其二女於河遂自沉死叔英二女不肯就錦衣獄俱赴井死其違命忍心如此後竟以羅織苛刻得罪誅至洪熙時諸臣宗族皆釋還田里天順中

英宗又釋建庶人之囚

孝宗廟有建言繼絕褒忠者於是瑛之罪益不可掩矣

張顯宗

張顯宗汀州寧化人少喪父其母黃氏守志教之
洪武辛未進士第二人授編修陞大理寺丞建文
中自國子監祭酒陞工部右侍郎往江西招集丁
壯募民出粟

太宗即位顯宗及江西布政使楊連按察使房安僉
事呂昇等并為軍卒執告其罪

上釋不誅謫戍興州顯宗文學多所著述惜其功名
不終一時歸附之臣有政事者如大理寺卿虞謙
侍郎徐宗有文學者如侍讀王景司業張智修撰

李實革雖免于罪咎然

文皇帝未嘗重之

李友直

李友直字居正保定清遠人始為北平布政司吏
以朝廷密事告于親藩語在張昺傳

太宗義師既舉遂擢用友直出理饟運入嚴城守率
以命之凡事皆集稱

上旨初授北平布政司右叅議既建北京改布政司
為行部陞左侍郎初作宮室友直受命經度勤督
甚勞弗解改行左工侍郎

仁宗臨御嘉念舊勞陞刑部尚書奉命代祀周文武成康陵及秦愍王墓既還言閔中民瘼深見嘉納賜誥命追贈三代宣德初改行在工部尚書凡有興作重役悉以委之死年七十與黃福楊士奇輩相莫逆其死也士奇為之撰神道碑銘稱其坦夷闔敏有長者風焉

胡廣

胡廣字光大吉水人生八歲而孤自幼好學日記數千言革除庚辰進士第一賜名靖除翰林脩撰擢侍讀歸附

太宗復命廣拜翰林學士兼左春坊大學士為

上所知一時制誥戒諭之文多出其手詔修五經四書性理大全命廣總裁嘗芝

上巡北虜出居庸關入沙漠王師所至功烈炳耀皆廣記述之十一年春

上幸北京再扈從出塞滅虜還既丁艱服闋進文淵閣大學士兼春坊嘗上却封禪頌歷數前代帝王不務國學矯誣上天卒貽天下後世笑時稱其有識自稱澹庵之後喜談忠義事嘗集文山事蹟為傳記序之以傳卒年四十九累贈少師謚文穆有

廣同時有解縉楊士奇夏原吉楊溥楊榮黃淮金
幼孜蹇義輩皆攀龍附鳳為時大臣云後大學士
李東陽讀所述文山傳記以詩跋之曰狀元忠義
古今傳野史何如舊史全刪述總煩胡學士姓名
猶記丙申年其意最微婉卒後公論乃定大都如
此

備遺錄引

備遺錄錄諸先正之忠於所事而以死殉之者也夫
諸先正之死烈矣於今纔百餘年而其遺事已落
落無傳至有舉其名而惜然者於乎忠義之名當
與天地同不朽顧湮沒亦至此耶嘗考商周之際
武王克商夷齊饑死聖賢之行若甚不能同者然
究而論之武王之所行者仁也夷齊之所守者義
也不有武王固無以安天下不有夷齊又何以風
勵後世而綿八百年之精神命脉哉此錄之所以
不容已也錄中四十六人名氏皆閩中宋君端儀

曾采輯為錄而未成者予因旁加考撫得方先生而下二十八事畧類而粹之以為斯錄一字一句皆據實以書不敢輒有增損其漫無可考者闕之以俟同志君子於乎諸先正之淑履關於世道也甚大非寡陋者所能測乃不自撥而僭為纂述如此其何以違不韙之罪也哉

正德丙子五月既望後學新淦張芹書于南臺公署

備遺錄目錄

黃子澄

齊泰

方孝孺

練子寧

黃觀

陳迪

卓敬

戴德彛

龔泰

廖昇

陳性善

胡閏

宋徵

王叔英

鐵鉉

侯泰

巨敬

甘霖

鄒公瑾

魏公冕

景清

陳繼之

張統

曾鳳韶

茅大芳

胡子韶

黃鉞

韓永

王度

高翔

王良

廖鏞

王良

程本立

陳彥回

石撰

程通

周是修

顧瓌

高巍

張曷

王省

姚善

葛誠

俞逢辰

林嘉猷

王璉

鄭恕

鄭華

程濟

謝貴

宋忠

馬宣

朱鑑

徐輝祖

黃彥清

劉政

彭二

盧原質

葉惠仲

牛景先

周璿

謝昇

郭任

盧迴

毛泰

黃魁

暴昭

董庸

盧振

已上總七十人

備遺錄

說纂二十三 雜纂十一

新淦張芹編清江教英校仁和後

學姜南續校增

太常寺卿黃公

公諱子澄江西分宜人初名湜以字行博學多才

洪武癸亥貢入太學明年京闈鄉試第二乙丑會

試第一進士及第第三名授翰林院修撰尋兼春

坊官侍東宮講讀遷太常寺卿太孫立諸王多不

心服一日太孫坐東角門召子澄告曰諸王尊屬

各擁重兵何以制之澄以漢平七國事為對太孫

喜曰得先生謀吾無慮矣及即位有言周齊湘代
岷五府為變者朝罷召子澄謂曰先生意昔東角
門之言乎子澄曰不敢忘也遂與齊秦謀遣李景
隆往執周王徒代王于邊以兵圍湘王于荆王自
焚死執齊王囚之京師岷王降為庶人 燕邸

亦加誚讓朝廷以子澄為功褒賞之己卯七月靖
難兵起移檄誅子澄及齊秦等耿炳文既敗詔李
景隆率兵百萬以往景隆自負文武材子澄授以
指畫景隆依違而已子澄甚憂之未幾景隆戰敗
奔還京師赦不誅子澄哭諫曰景隆出師無紀意

在觀望不誅之以誅宗社何以懲將士不聽已而
徐凱盛庸繼踵敗衄顧成等皆降子澄撫膺慟曰
大事去矣萬死不足贖誤國之罪矣乃賦詩以志
痛詩曰伏鉞曾登大將壇貂裘遠賜朔風寒出師
無律真兒戲負國全身獨汝安論將每時悲趙括
攘夷何日見齊桓尚方有劔憑誰借哭向蒼天幾
墮冠聞者哀之尋用廷臣議謫子澄及秦于遠方
以快敵其意實陰使之募兵也時諸將猶守淮南
而文廟之師渡江矣京城破子澄死之宗黨連坐
者甚衆

兵部尚書齊公

公諱泰應天府溧水縣人洪武丁卯鄉貢進士始名德後受知於高廟改賜今名筮仕禮部主事一日雷震謹身殿

上躬禱於天擇九年無過官陪禮泰與焉乙亥為兵部左侍郎戊寅進本部尚書嘗被召問邊將姓名泰歷數無遺又欵考諸圖藉泰出袖中手冊以進自是益承眷遇及上棄群臣泰與受顧命輔嗣君日見倚重遂與黃子澄議削弱諸藩邸及靖難兵起泰主用兵之策命將出師多其籌畫嗣君惟

召學士輩討論周官法度處便殿弄翰墨而已聞外事一以付泰泰遂移檄指斥親王或難之泰怒曰名正言順敵乃可服是何言邪語聞泰罪遂重泰以谷王漏師遁還慮遼寧二府為變召還京師寧王與靖難師合惟遼王至始與北兵戰猶互有勝負及勢不可支乃謫其官以求解兵時二年七月也李景隆奉書文房謂齊黃皆以屏竄遐荒可息兵矣文皇不信進兵益急尋召泰還而京城已定嗣君出走泰追之不及至廣德州時翰林修撰王叔英在州募兵以泰為二令州人執之既

至泰告之故乃釋與圖再舉後被執不屈而死親
黨連及者數百人或云泰之脫走也乘白馬極駿
行遠汗流墨脫
慮人識之乃以墨塗黑馬既而
竟為人所蹤跡

翰林侍講方公

公諱孝孺字希直一字希古別號遜志浙江寧海
人父克勤為濟寧太守子三人公其仲也生之夕
有木星墮於其所自幼精敏絕倫雙瞳炯炯如電
日讀書積寸年十四五侍父北遊歷齊魯故墟覽
周公孔子之廟宅求七十子遺蹤慨然以為彼七
十子縱顏閔未可及也其餘若樊遲冉求輦使與

之同時豈皆讓之但今世無孔子者出不得所依
師追耳自是精思力踐進修不已弱冠從學宋濂
時所收皆天下名士公五經百家皆已蘊藉凡理
學淵源之統人物絕續之紀盛衰幾微之載名物
度数之詳靡不研精離析而會歸於大通謂化民
必自正家始作宗範九篇以告宗人嘗卧病絕糧
家以報輒曰古人有三旬九食甑無儲粟者窮豈
獨我哉因與大笑而止父嘗被誣謫戍江浦上疏
乞代役不報洪武十五年吳沉揭樞等薦公可大
用聘至入見稱

旨上謂大孫曰此莊士也當老其才以輔汝試靈芝
甘露論諭遣還家丁卯復召至

上方重賞爵以其志存教化謂左右曰今非用孝孺
時乃擢將士佐郎漢中府學教授蜀獻王延之處
以賓師使之講經論無虛咎當時蜀治依於禮樂
公之功也丙子校文應天戊寅大孫即位召為翰
林侍讀學士每臣僚奏事必命公就扈前批答言
聽諫行近古作無公嘗作書事詩曰斧扈臨軒几
硯間春風和氣滿龍顏細聽天語揮毫久攜得香
煙雨袖還風軟彤庭尚薄寒御爐香繞玉闌干黃

門忽報文淵閣天子看書召講官其相與如此朝
議削弱諸藩公與其謀靖難起移檄誅姦臣公名
與焉姚廣孝嘗啓 文廟曰殿下入京慎勿殺方
孝孺殺死人天下讀書種子絕矣至是勢迫公自
分必死乃作絕命詞其畧曰天降喪亂兮莫知其
由姦臣得計兮謀國用猶忠臣發憤兮血淚交流
以死殉君兮抑又何求嗚呼哀哉兮庶不我尤既而
文廟踐柝求代草者廣孝薦公召之數四乃以哀服
入見慟哭不止授以筆投之地 文廟曰吾效周
公輔臣王而來公日既稱周公輔成王今成王安

在且成王既沒當立成王之子因有滅十族等語
文廟大怒命割其舌乃含血犯御座語極不遜磔
之至死乃已遂誅其宗親八百四十七人焚夷其
先人墓後仁廟嘗與近臣論及曰孝孺是個忠臣
永樂二十二年十一月御劄禮部建文中姦臣正
犯已受顯戮家屬初發教坊司錦衣衛浣衣局并
習匠及功臣家為奴今有存者既經大赦可宥為
民給還田宅於是惟一子婦魏氏得歸即其故居
立祠祀之所著遜志齋集行於世或云初李景隆
父子好賢下士
與公文誼甚篤景隆之帥師北伐由公薦之既而
兵敗不誅漸有異志人多知之以告建文建文雅

信公遂不復疑卒開門
以降蓋不免於誤國也

副都御史練

公諱安字子寧以字行江西新淦人父伯尚洪武
間為起居住以直言忤旨謫歸德州同知後迂臨
安鎮江府通判卒于官公性資英邁志操不凡幼
從鄉長者行莊先生遊行莊命賦水竹村居有千
山暮雨石泉通一夜春雷則龍長之句竹莊甚奇
之後遊邑庠與金公幼孜相友善嘗謂之曰子異
日必為良臣我當為忠臣洪武甲子領鄉薦明年
入對大廷極言朝廷用人徇其名而不求其實以

小善而迅進之以小過而迅戮之因歷陳古人所以教養任用之道言甚剴切切高廟嘉之擢第二名進士第授翰林院修撰公益以名節自礪於是聲望藹然未幾以母喪去位力行古喪禮服闋陞吏部左侍郎尋遷御史臺左副都御史革除間與方公孝孺等特見信用靖難師起公極論曹國公李景隆姦邪不忠一日於朝班內執景隆數其罪奏請誅之不聽公憤激稽首請先伏誅遂罷朝師既渡淮靖江府長史蕭用道衡府紀善周是修上書論大計指斥用事者罪書下群臣及兩人議用事者怒盛氣以詬兩人公言國事至此尚不容言者手顧所論吾過有則改之無則加勉詬者愧而止文廟既統召公貴問公不屈而死嫺親被逮戍邊徼者甚衆惟吉水錢氏得免及錢公習禮仕於朝為鄉人所持恒懷不安以告少保楊公榮楊公秉間以聞文廟欣然曰使練子寧今日在此朕固當用之耳後同知王佐輯公遺文一帙序之曰金川王肩集提學副使李孟陽立金川書院祀公父子名其堂曰浩然而刻石記焉

禮部右侍郎黃公

公諱觀字瀾伯一字尚賓池州貴池人父贅于同
邑許氏從其姓公既仕始復性公自幼穎異長受
業於元翰林制黃公殷士天兵入大都殷士死之
公益砥礪以忠義自許洪武庚午領鄉薦辛未入
對禦戎策大要以天道福善禍淫之機人事練兵
講武之法為言 高廟嘉之擢狀元及第授官翰

林尋陞禮部右侍郎革除年間改官制增侍中員
次尚書以公為之與方公孝孺等日見親用靖難
師既渡淮公徵兵上游率諸郡人援奮不顧家且
行且暮兵至安慶聞京城已定痛哭謂人曰吾妻

素有志節必不受辱遂招鬼塋之江上明日家僮
自京逃來果言夫人翁氏暨二女俱被執有象奴
得之叱取釵釧出市酒殺夫人遂攜二女率家屬
二女赴淮清橋下溺焉公舟至李陽河渡大事已
去不可為乃東向再拜於羅漢磯湍水急迅紹舟
人奮擢遂自溺焉郡人柯暹嘗為傳其事匿不示人
後知縣清江龔守愚於公所居故址學宮之西立
祠祀之

禮部尚書陳公

公諱迪字景寧國宣城人曾祖巨卿元江州路總

祖宥賢父仲康撫州守禦千戶所百戶公自幼個
儻有志操洪武初辟郡學訓導己未以通經召除
翰林編修乙丑陞侍講預修大典辛未陞山東布
政司左叅議捕蝗弭盜民甚德之甲戌丁內艱奪
情起服辭不允乙亥陞雲南左布政使時曲靖烏
撒烏蒙等處苗賊猖獗公率師擊破之獻俘於
朝有白金綵幣之賜戊寅陞禮部尚書革除二年水
旱求言公條陳清刑獄恤流民等事多見采納尋
加太子少保辭所兼俸不受靖難師起公與太常
寺卿黃子澄兵部尚書齊泰等上疏陳大計

文廟繼統召公責問公不屈與子丹山鳳山等六人

同曷于市

丹山等哭呼曰父親累我輩也迪曰今日休說這語一云迪之臨行也文皇

帝割其子肉塞入迪口令自啖之因問曰好喫否迪曰這是忠臣孝子底肉香美好喫我若是亂臣

賊子云云

初廷臣同約死義者二十五人惟鄭賜黃福尹昌

隆歸附後數十年有司於公故居立祠祀之

文廟 戶部侍郎卓公

高公諱敬字惟恭浙江瑞安人後徙滄州博學多能
談論英發天文律曆地理兵刑皆造其奧十五六
歲時讀書寶香山嘗夜歸值風雨路得一牛騎以

行及門縱之則虎也洪武戊辰由進士為給事中
嘗言諸王服飾踰制

高皇笑而納之歷宗人府經歷進戶部侍郎革除初
文廟入朝卓密奏曰燕王智慮絕人酷類

先帝夫北平者強幹之地金元所由興也宜徒燕封
南昌以絕禍萌夫萌而未動者幾也量時而為者
勢也勢非至剛莫能斷幾非至明莫能察疏上建
文君大驚袖而入事竟寢後靖難兵入有執敬數
之曰此得非前日奏裁諸王者耶敬厲聲對辭不
遜且曰若用敬言王何能至此

上怒欲殺之繫之獄使人諷之受官不屈姚廣孝乃
借吳不殺范蠡而蠡卒滅吳王衍不殺石勒而勒
終滅衍夫敬言誠見用

陛下豈有今日於是斬敬夷三族

左拾遺戴公

公諱德彛浙江奉化人洪武甲戌進士第三授翰
林編修甫三載陞侍講上諭之曰官翰林者雖
以論思為職然既列近侍旦夕在朕左右凡國家
政治得失生民利病當知無不言昔唐陸贄崔群
李鋒之徒在翰林皆能正言謹論補益當時顯名

後世爾盍以古人自期待哉公與侍讀張信皆頓首謝由是感奮思所以稱上意拾遺補闕直聲振於朝改監察御史益善于其職革除間改左拾遺靖難師既迫於黃子澄齊泰方孝孺練子寧胡閏宋徵韓永等日夜畫策防禦後俱死難

都給事中龔公

公諱泰字叔安浙江義烏人九歲而孤母傅氏躬教之洪武丙子領鄉薦入太學授戶科給事中壬午六月靖難師駐金川門與妻傅訣曰顧事至此吾分死矣爾齎勅携幼釋以歸否則俱溺于井辱可免矣言未竟火起內廷公馳赴之道為兵校所執見上於門外命非姦籍者釋之公亦釋遂從城上投下而死時年三十六

太常寺少卿廖公

公諱昇洪武中為五軍都督府斷事二十九年六月遷太常寺少卿革除中修太祖實錄與侍讀學士高巽志俱為副總裁壬午六月京師平自縊死

副都御史陳公

公諱性善初名復以字行浙江山陰人洪武丁丑進士授行人司副遷翰林院檢討動止安雅書法

精研 上嘉悅之超拜禮部左侍郎革除間以副
都御史監李景隆軍北伐白溝河之敗朝服躍馬
入河以死

大理寺少卿胡公

公諱閏字松友江西鄱陽人嘗題竹詩于吳芮祠
壁間 太祖征陳友諒時見之深加歎賞陰記其
姓名 詩云西人無俗懷寫此蒼龍
骨九天風雨來飛騰作靈物 後以薦至闕上
識之曰此題詩鄱陽廟者也授都督府經歷革除
間累迁大理寺左少卿靖難兵入京師死之

宗人府經歷宋公

公諱徵革除間建議親藩不順削其屬籍故靖難
之兵討焉事平就戮其詳不可考

翰林修撰王公

公諱叔英字原采號靜學浙江黃巖人洪武中為
漢陽縣知縣革除初召為翰林修撰上資治八策
曰務學問曰謹好惡曰辯邪正曰納諫諍曰審才
否曰慎刑賞曰明利害曰定法制皆授古證今鑿
鑿可行且曰 太祖皇帝除姦剔穢抑強鋤梗如
醫者之去疾農夫之去草然急於去疾則或傷其
體膚嚴於去草則或損其禾稼固自然之勢今體

膚疾去之餘則宜調燮其血氣禾稼草去之後則
宜培養其根苗亦宜然之理也識者知公有經濟
遠畧靖難師起公奉命募兵廣德知事不可乃為
沐浴具冠服書絕命辭曰人生穹壤間忠孝貴克
全嗟予事君父自昔多過愆有志未及竟苛疾忽
見纏肥耳空在案對之不能嚙意者造化神有命
歸九泉嘗聞夷與齊餓死首陽巔周粟豈不佳所
見良獨偏高縱遠難繼偶爾無足傳千秋史臣筆
慎勿稱希賢又書於案曰上既久矣愧無補於當
時死亦徒然庶無慚於後世遂自縊而死公將死

以書抵祠山道士盛希年曰可塋我祠山之麓希年卒
收塋之後廣德知州莆田周英重修公墓立石為記

兵部尚書鐵公

公諱鉉河南鄧州人洪武間由國子生授禮科給
事中一云初為都督府斷事奏對詳明

高廟喜之字之曰昂石嘗有誣藩府違法狀者召至
屬法司鞫之數日獄未成高廟怒屬公鞫之片
時而成自是益見愛重凡法司有疑獄必以屬公
未幾擢山東布政司叅政靖難師起曹國公李景
隆奉命出師駐德州公督漕運飛芻挽粟水陸並

進未嘗乏缺俄軍敗南奔公與斷事高公魏相遇於臨邑遂協謀募兵固守濟南既而被圍相持不下城有攻破者輒完之受圍既久乃伏兵門內開門詐降款誘文皇入城下閘板閉之幾中其計已而出兵戰城下靖難師大敗奔還凡三月圍始釋事聞賜金幣封三代入謝陞右布政使尋陞兵部尚書佐大將軍歷城侯盛鏞總天下兵北伐林帥文廟總統以計擒之械至京師責問不屈而死

刑部尚書侯公

公諱泰

不知何所人

革除間為刑部尚書靖難師起公

主抗禦之策壬午二月運糧至濟寧諸郡五月復運糧至淮安時京師已告急六月赴京行至高郵被執七月十一日就戮

戶部主事巨公

公諱敬山西平涼人革除間為戶部主事與陳迪等俱被執責問不屈而死

監察御史甘公

公諱霖安慶懷寧人洪武丁卯領鄉薦為監察御史持正不靡及

文皇即位執述不從被執求死乃伏誅

鄒魏二公

鄒公諱公瑾魏公諱公冕俱江西永豐人鄒為大理寺丞魏為監察御史靖難師駐金川門有約開門迎納者二公率同僚十八人即殿前歐之幾死其日輟朝二公大呼曰請連加誅臣等義不與同生不聽次日宮中自焚走 文廟繼統二公俱自殺

僉都御史景公

公諱清陝西真寧人革除間為僉都御史以剛直聞文皇入南都清死之一云文皇既即位清陽臣服而陰懷豫讓之志文皇夜多有紅衣人挾刀圖不執者遂驚覺明日視朝令適搜群臣清果衣紅而潛挾利刀詰之對曰款

為故主報仇耳乃用鉄箒刷其肉至盡親屬連坐者尤衆

給事中陳公

公諱繼之福建莆田人登革除二年進士授戶科給事中以江南僧道多占腴田蚕食百姓乃奏請僧道人給五畝餘以賦民從之靖難師起公累有建明因肆指斥 文廟繼統召公責問不屈而死 吏部尚書張公

公諱統字昭季別號鷄菴陝西富平人父號月川文行知名公於識通敏洪武間由明經舉歷雲南布政司右叅政進左布政使凡雲南土地貢賦法

令條格祀神壇祠公署解宇與夫上下典儀公用
程度悉公裁定夷民心孚遠近真安洪武三十年
三月入覲考最為天下第一三十一一年為吏部尚
書 文廟繼統命公與戶部尚書王純俱以半俸
致仕公遂自縊于部之後堂

監察御史曾公

公諱鳳韶江西廬陵人洪武末年進士革除間為
監察御史嘗侍朝班彈劾無所避忌聞者駭愕靖
難師起議遣使致書請罷兵歸國無敢行者公獨
請行至軍前不納公取竹通節入書鼓風達之亦
不報 文廟繼統嘉其直復以御史召不赴尋加
侍郎召又不赴乃刺血書憤詞於襟其畧曰予生
居廬陵忠節之邦素負骨鯁之強讀書而登進士
第仕宦而至繡衣郎慨一死之得宜可以含笑於
地下而不愧吾天祥囑妻李氏子公望勿易衣遂
自殺時年二十九李氏亦死於節

副都御史茅公

公諱大芳秦州人洪武間以儒士應辟典教淮南
考績入朝 高廟召對悅之擢秦府長史且勉以
董子輔相之業公以特受隆遇惧無以稱益自感

激諫諍彌綸得大臣體踰年秦國稱治革除間累
官副都御史靖難師起公以詩寄淮南守將梅啟
曰幽燕消息近如何聞說將軍志不磨縱有火龍
翻地軸莫教鉄騎渡天河閔中事業蕭丞相塞上
功名馬伏波老我不才無寸補西風一慟一悲歌
聞者壯之

文廟繼統不屈而死

刑部侍郎胡公
公諱子韶字仲嘗一字伯尚舊名志高方孝孺之
教授漢中也公從之遊後以儒士薦至京師
高廟重之革除間為史官歷山東按察僉事遷刑部

侍郎壬午九月十一日受戮

四川嘉定州榮縣人

戶科給事中黃公

公諱鉞字叔揚蘇州常熟人洪武初以太學生授
典史後登革除庚辰進士遷戶科給事中以憂家
居壬午歲自投琴川橋下死

兵科給事中韓公

公諱永陝西西安人

一云山西字山人

革除中為兵科給事

中

一云

與陳迪巨敬戴德彛等俱被執責問不屈

而死

監察御史王公

公諱度字子中惠州歸善人由明經儒士授山東道監察御史有直聲嘗監革除二年會試壬午七月以姦黨發賀縣千戶所充軍後出不遜語坐族誅監察御史高公

公諱翔陝西朝邑人有文學洪武中以明經薦授監察御史所論奏皆閔國家機事文廟素聞公名及繼統召公將用之公喪服入見語又忤旨乃

坐族誅

翰林修撰王公

公諱良字敬止江西吉水人唐辰進士初取狀元將傳臚以貌不

及胡廣乃以廣易之公次焉遂導洪武乙丑事例首甲三人皆授翰林修撰

聞靖難師起憂怛

不食日就羸憊以辛巳九月卒革除君閱之遣禮

部侍郎黃觀諭祭于家

吉安志云文廟繼統群臣多往迎附公慟哭與妻子訣是夜服腦子死非實

散騎舍人廖公

公諱鑄無為州巢縣人德慶侯權之子革除間以

元勲後任散騎舍人見用癸未四月十日就戮母楊氏東

甌王長女也入浣衣局弟銘鉞俱充軍

浙江按察使王公

公諱良字天性河南開封府人居嘗以忠孝自許建文辛巳坐事以刑部侍郎左遷浙江按察使謁

岳飛基誓曰苟愧武穆非人也壬午六月聞難慟
哭誓必死會命使召公公集本司及各道印于
私第嗟嘆者久之妻問故公曰我分應死顧忠所
以處汝未決耳妻曰我則不難處君為男子乃為
婦人謀手遂投池水而死公即列薪于戶命妾抱
幼子往某僉事家以宗祀為託遂闔室自焚事聞
上曰死自其分燬印可罪耳徙其家于邊

江西按察副使程公

公諱本立字原道別號巽隱族出伊川遠祖祀自
開封徙杭曾祖鵬自杭徙秀州崇德父德剛生公
於鳳鳴里公少有大志聞金華朱彥修兄弟得考
亭之學於許文懿公乃往就學造詣日深洪武丙
辰舉明經秀才擢秦府引禮舍人召見

奉天門下賜馬足楮幣在任五月以母艱去庚申服

除補周府禮官從王之國大梁丁卯春從

王朝京師彼累謫雲南馬龍他即旬長官司吏目
留家大梁以一僕之任所部百夷叛逆公單騎深
入為書諭以禍福諸夷感悅邊事以息時西南當
王師初靖餘孽尚驕長官不能戢遂屢生變公因
創為振濟安撫之計身歷艱險自楚雄姚安以逮

大理鶴慶麗江永昌咸賴其撫綏由是軍民得安
戊寅奏計京師府尹向瑤學士董倫交章薦其文
行乃徵入翰林纂修高廟實錄陞左僉都御史
辛巳歲以失悞陪祀調除仍留翰林纂修明年實
錄完調江西按察副使未及行適靖難兵渡江公
有所見而遂自盡實壬午六月十三日也官因追
其恩典家無遺貲時稱為清御史所著有巽隱集
四卷藏于家

徽州府知府陳公

公諱彥回福建莆田人父諱立成洪武間歷任州
縣以罪被誅家屬發戍雲南之臨安多道卒北至
蜀惟公與祖母郭氏存旣而遇赦無資以還乃
依定遠知縣鄉人黃積良以居遂從其姓更名禮
未幾積良亦謫去公轉依南充縣丞于中和其後
閩中教諭嚴德政以明經薦公為保寧府學訓導
九載考績高廟親擢為平江知縣明年高廟
晏駕公捧入香臨給事中楊惟中等薦陞徽州府
明年朝覲考覈稱職賞賚甚厚其年丁郭氏憂徵
民詣闕奏留未報革除已卯春公乃疏其改姓歷
官情罪乞正名籍乃罷為民尋命復官留治郡事

公復上疏乞終制得許歸葬葬畢即回郡供職
明年復蒞徽州會靖難師起公募義勇赴援文
廟繼統械至京師不屈而死

寧府左長史石公

公諱撰山西平定州人洪武中為寧府左長史
太宗靖內難諸郡縣皆下撰在大寧獨為守備
上怒攻拔之得撰不為屈遂支解而死

遼府左長史程公

公諱通字彥亨績溪人祖平素業儒洪武初謫戍
延安有同謫而旅死者平遣子以誠負遺骨歸其

家其家以貧故不納又買地葬之公少有至性動
必遵禮以縣學士貢入太學聞父喪徒步歸葬廬
基下三年哀慟毀瘠妻子至不相識時平以老公
上書言臣壯而無父祖猶父也臣祖老而無子孫
猶子也更相為命願代為役辭極懇切上歎曰
孝哉若人命兵部除其籍驛送平還鄉後舉應天
府鄉試授遼王府紀善以祖喪免歸復廬基三年
服闋進左長史從王之國靖難師起朝廷遣人
告急通草上對事数千言進之文皇入繼大統
知公有封事詔械詣京師死之家人戍邊錄其家

得田數十畝遺書數十百卷而已公初讀書即勵志聖賢之故所立如此

衡府紀善周公

公諱以德字是修以字行江西泰和人洪武間為霍丘訓導入見高廟問曰汝年幾何對曰年四十四又問曰家居何事曰導人為善而已高廟喜擢周府奉祀正革除初年有訴王府不法者官屬皆下吏公以嘗諫得免改衡府紀善任編纂於翰林靖難師起公數論國家大計及指斥用事者誤國用事者怒共挫折之公不為動師入金川門公留書別友人江仲隆解縉紳胡光大蕭用道楊士奇且付後事暮入應天府學自縊死越數月御史言公不順天命請加追戮文廟曰彼食其祿自盡其心耳置不問公平生負氣節嘗曰忠臣不以得失為憂故其言無不直貞女不以死生為慮故其行無不果卒能償其志云

沛縣知縣顏公

公諱環字伯瑋江西廬陵人唐魯公真卿之後以賢良徵授徐州沛縣知縣未幾靖難師起所過郡縣皆歸附公獨以死自誓時曹國公出師駐德州

公督民給軍餉措畫有方未嘗闕乏辛巳六月靖
難師直擣濟寧過沛沛民竄匿公招來之九月設
沛豐軍民指揮司集民壯五千人築堡備禦壬午
正月靖難師駐沙河二十二日攻沛公遣縣丞胡
先詣徐州告急既而度不能支預送其子有為出
走告之曰汝遷家白大人子職弗克盡矣題察院
壁曰太守諸公監此情只因國難未能平丹心不
改人臣節青史誰書縣尹名一伎豈能支大厦三
軍空擬築長城吾徒雖死終無憾望采民艱達
聖明夜二鼓師入東門指揮王顯迎降公冠帶升堂

南拜大哭曰臣無以報國矣乃自縊死其子不忍
去復還公已死矣遂自刎以從俄擒主簿唐子清
典史黃謙至亦死之縣丞胡先收公父子尸葬沛
南閔題曰顏公墓

前斷事高公

公諱巍字不危山西遼州人洪武十五年應貢入
太學十七年以孝行被旌表尋授前軍都督府試
左斷事十八年上疏欲墾河南山東北平兵後荒
田及抑末設慎選舉惜名器數事高廟深嘉納
之後因斷事不稱旨當罪以議賢謫戍貴州閔

索嶺仍許以姪代役革除初年上疏陳情乞歸田里許之既而遼守王欽辟送赴銓曹靖難師起公建議乞效主父偃下推恩之令分封藩王子弟以少其力遂命公從曹國公李景隆出師參贊軍務公累上書 文廟請罷兵歸國不報俄而戰敗隨景隆南奔遇督餉參政鐵鉉於臨邑遂與協謀固守濟南頗著勞績後從征晉陽鴈門等處既而聞京城已定乃縊死驛舍

北平左布政使張公

公諱昺山西澤州人國初舉人材革除間為禮部

侍郎時欲削弱諸藩凡王封所在悉更直守臣以素負重望者居之乃以公為北平左布政使公察文廟必起兵遂與都指揮謝貴以在城七衛及田軍士列九門防守掾吏李友直泄其謀會朝廷遣內官逮護衛官屬 文皇召公及貴入府執之皆不屈而死也巳卯七月六日及繼統族誅其家後 上屢夢公等披髮為厲 命出其尸焚而棄之面猶如生

濟陽教諭王公

公諱省字子職江西吉水人洪武壬子領鄉薦明年詔免會試命吏部次第擢用之公以親老乞歸養復

以文學應徵 高廟親試稱旨例當殊擢公以才
薄力弱親老乞便授浮梁教諭尋丁外艱起改隹
陽八年改濟陽靖難師至濟陽公為遊軍所獲從
容引譬辭義慷慨衆舍之公乃陞明倫堂召諸生
謂曰若等知此堂何以名明倫今日且都下說只
說君臣之義一節如何遂大哭諸生亦哭遂以頭
觸堂柱而死後有司立祠學宮祀之其子禎為燕
州通判亦死于賊

蘇州府知府姚公

公諱善字克一湖廣安陸州人初姓李後復今姓

志行純實學識高遠工詩洪武中由鄉舉歷祁門丞
同知廬州重慶所至有能聲三十年擢知蘇州治
為列郡最隱士王賓獨居陋巷公往候見舍車騎
詣門賓問為誰應曰姚善乃開門延語及賓報謁
面府門再拜而去公自邀還賓辭曰非公事不敢
入也又將候韓奕奕避之入太湖公歎曰韓先生
可謂名可得聞面不可而得見也已卯靖難師起
公畫策勤王與有勞焉壬午京師平時黃子澄朝
廷索之急避於公所約與航海公曰在公則可在
善則不可善守土之臣當與城存亡子澄去善竟

伏節而死或記云當時燕師日迫建文君與方孝孺用漢破七國之策賤齊黃于外善言于朝曰有文武才畧可以扶顛濟危者及置之散地不用今事狼狽須急召之詢其姓名不對再三詢之則曰於今人才豈有過於黃大卿哉遂復召二人不至則是善嘗在朝也然其詳不可考矣

燕府長史葛公

公諱誠不知其所以進靖難師未起時

文皇嘗病中署布政使張昺偕三司官入問疾見

文皇四圍皆着火爐猶自呼寒皆惧危篤獨誠密語

云非病也不得于上故耳因令人上變會

文皇遣人至京奏事齊泰等言于建文君執之既成

獄即發符逮王府官屬後謀不果見殺族其家

教授俞公

公諱逢辰南陽鎮平人兵起時以哭諫被戮

陝西按察僉事林公

公諱嘉猷本名昇以字行浙江寧海人洪武中以

儒士校文四川後入史館累遷陝西僉事嘗得

燕邸密事以告方孝孺壬午九月丁亥被戮時遣錦衣千戶

張安齋書許世子襲封公謀也

寧波知府王公

公諱璉字器之莒州日照人學通經史長於書秋

初任教授謫遠方洪武末以賢能薦授寧波知府

清儉律已平易近民杜私謁革吏弊政教兼舉而自奉儉約一日見饌有魚肉大怒命撤而瘞之號埋羹太守惟痛繩武人之不法者以故軍衛啣之靖難兵迫方造船航海勤王為軍衛縛送京師文皇問造舟何為對曰由海趨瓜州以截來路耳上義而釋之得還田里

蕭縣知縣鄭公

公諱恕台州仙居人由訓導遷蕭縣知縣靖難師至竭力拒守被擒而死時年五十六歲二女當給配亦死之子瀛湜皆從坐

東平州判官鄭公

公諱華台州臨海人洪武丙子貢士授行人革除間謫東平州判官將赴任聞靖難師至以妻子託其友人馳至東平力疾戰死

岳池縣教諭程公

公諱濟陝西朝邑人洪武間以明經為四川岳池縣儒學教諭公有法術岳池去朝邑數千里寢食俱在朝邑而日治岳池學事不廢革除間上書言某日西北方兵起朝廷以為非所宜言繫至京召入將殺之公叩頭曰陛下幸囚臣期而無兵臣

死未晚也遂繫公獄已而兵果起乃赦出公更以
為軍師護諸將北伐與靖難兵先鋒戰于徐州大
捷會曹國公師退文皇至江上公逃去不知所
終初徐州捷時諸將樹碑載戰功及充軍者姓名
公忽夜往祭碑人莫測其故後文皇過徐州望
見碑問知之大怒趣左右碎碑方一再推命止
勿擊錄其碑文遂按碑族誅諸將無得脫者公姓
名正在擊處遂免往日之祭蓋禳之也

北平都指揮使謝公

公諱貴革除間議削諸藩文皇稱疾齊泰謀以

備虜為名以貴為北平都指揮使與張昺潛通王
府官屬覘察動靜貴等謀欲先發同官張信與布
政司吏李友直入王府告變遂與昺同召入端禮
門伏發就擒而死

叅將宋公

公諱忠革除間朝儀欲削燕邸命公為叅將以
備虜為名練兵北方守懷來靖難師至公帥兵拒
敵將士多北平人對陣時見其父兄弟皆無鬪
志遂大潰公被執而死

都指揮馬公

公諱宣奉命守薊州靖難兵起朱能張玉來戰公與鎮撫曾濟等閉城堅守玉等反覆論之不下遂擁衆急攻宣率兵出拒玉遣精銳衝敗之遂與濟皆被執而死事聞革除君褒卹之

都指揮朱公

公諱鑑提兵守大寧靖難師至拒戰而死事聞革

除君閔之卹典加厚

祖傳鑑與馬宣之死皆畧無異辭云當時用兵累年武臣死事者甚衆不能悉紀

魏國公徐公

公諱輝祖中山王達之子襲封魏國公高廟崩諸王世子及郡王多在京遺命三年喪畢遣還時

仁廟漢庶人趙王皆留遺詔至北平 文皇有疾

遣人扶掖哭臨語莫能辨如是數月乃乞 仁廟

及漢趙視疾朝廷以遺詔不許既而屢請益哀懇

建文君將許之輝祖不可乃止明年 文皇疾愈

入朝復申前請建文不忍違召輝祖及弟都督增

壽議增壽獨以百口保無他虞 仁廟及漢趙遂

得還國蓋 文皇后中山王女也故朝廷謀必及

之靖難師將起輝祖復與齊黃陰謀加兵于燕及

文皇即位齊黃輩皆死獨輝祖以中山王之子赦

不誅革爵閑住尋繫獄而卒永樂五年八月朔日奉

聖旨比先徐輝祖與黃子澄齊泰盧振張曷葛誠等
通同謀危社稷以後事發黃子澄等伏誅徐輝祖
是中山王男因念中山王比先平定天下有大功
於國家以此不曾罪他只着在間今病故了中山
王的功不可忘如今着他嫡長男還襲中山王原
封魏國公爵中山王歿後的祿米戶部查了都還
他
已上五十五人
黃公彥清不知何所人革除間巡撫某地文皇即位
願詔至不受命謀欲起兵其下皆以歸附力寡
而死

劉公諱政字仲理蘇州人父以禮洪武中薦授沛
縣教諭公聰明好學平生以忠義自許革除已卯
中應天鄉試第一不知會授某官壬午歲不食而死

彭公諱二北平都指揮已卯七月與張曷謝貴同死
盧公諱原質浙江寧海人洪武戊辰進士第二歷
翰林編修陞太常寺少卿

葉公諱惠仲浙江寧海人嘗以知縣充修史官為
庚辰會試考官後陞知府

牛公諱景先不知何所人革除間嘗抗禦靖難師京師平
逃難出走而死

周公諱璿青州諸城人曾與抗禦靖難師壬午內

難平戮死不知其官

謝公諱昇不知何人曾犯靖難之師壬午歲伏誅父旺

子咬兒俱發金齒衛充軍

郭公諱任鎮江丹徒人戶部侍郎一云定遠人

盧公諱迴台州仙居人戶部侍郎

毛公諱泰吏部侍郎

黃公諱魁禮部侍郎

暴公諱昭刑部侍郎

董公諱庸監察御史

盧公諱振

已上一十五人事迹未詳

附錄永樂二十二年仁宗即位御劄付禮部

尚書呂震曰建文中姦臣其正犯已悉受顯

戮家屬初發教坊司錦衣衛浣衣局并習匠及

功臣為奴今有存者既經大赦可宥為民給還田土

書備遺錄後

予校斯錄竊謂臣之無二天之制也以死殉之臣道之終也諸先正真無愧於斯矣雖無忠義令名因時或悔然方其致命也豈計不朽名哉求無愧此心而已抑其純剛正氣充養完粹一臨大節則定見定力自有烈烈不可奪者是宜派風百世砥柱名節究厥由來我

高皇帝開天養士之功亦不可誣也故幸其遺事一二僅存君子莫不寶之如鳳毛麟角矣誰忍棄之噫後之讀斯錄者豈獨隕英雄之淚於編簡而已

哉

正德丙子五月既望後學清江教英拜書

